

【蛻變】徐佳妤原作

記得俵仔讀小學個時節，放學轉到屋下興嘍嘍仔¹同 分享，上自然課，先生紹介揚蝶仔，佢感覺著當生趣，問：「阿姆，做得畜虐毛蟲無？」淨聽過有人畜細魚仔、蠶仔²、雞油蛄，哪有人畜虐毛蟲？

該時， 在學校做志工，同圖書室個細阿姊仔打嘴鼓，佢講：「淨愛種一頭柚仔樹抑係柑仔樹，就會有揚蝶仔飛來生卵。你過準備一隻罐仔，裡肚放一支細樹極，恁樣就做得哩嘢。」一聽著，心肚當疑狐：自家又無歇在莊下，種一頭柚仔樹就會錫揚蝶仔來，哪有可能？毋過，「狗呷烏蠅，賭造化」³罔試看啊。

講來奇怪咧！有一日，正經有一隻揚蝶仔，在 兜種個柚仔樹脣飛來飛去，飛上飛下。心肝惱：佢在該做麼个呢？目金金仔緊看，佢緊撲翼，又對屎朏尾緊屙出細細粒、黃臘臘个卵在葉仔項。細心細意，摘下這皮葉仔帶轉屋下放到罐仔裡背。

幾日過後，幼蟲對卵肚鑽出來，一出世，黏時食忒卵殼。虐

毛蟲當揀食，淨食合意个葉仔，像一個當肚飢个細孬仔，葉仔分佢食到淨淨淨，淨伸葉脈，俵仔都赴毋掣摘葉仔分佢食！佢兜緊食圓身緊大箍，該白烏色个衫褲忒狹，僅可脫下舊衫換青衫。

有時節，蠻皮个俵仔係「頭那插禾串」捺刁佢，佢會跔等臥起圓圓大大个頭那，還過伸出紅紅个角，放出像榴槿恁樣臭胖胖仔个味緒，想愛嚇走欺負佢个人；毋過，若係正經堵著烏仔、油籬蜂，佢兜斯插都毋插。有一擺， 識看著，自家畜个虐毛蟲毋知分對哪來个蜂仔食忒，衰過个虐毛蟲，瀉都毋掣！一無注意，嘎發生恁樣悲慘个情形，實在得人驚！

虐毛蟲每日都盡命拈緊食葉仔，食到圓身肥卒卒毋知飽。有一日暗晡，看佢辽辽腦轉⁴，葉仔毋食，淨在罐仔肚越來越去，毋知在該無閒麼个。佢屙了一堆青青个瀉粍，俵仔問：「佢係發病仔無？仰會屙痢肚？」忽然間，佢越在該樹極項，呢絲⁵同自家吊掛起來，膠自家跔等⁶，囿在蠶筴⁷肚，像睡忒哩！

過一禮拜零，蠶筴變色，像變奇術樣仔，虐毛蟲對蠶筴肚鑽出來哩啲⁸！毋過，溼溼、皺皺个翼還吉燥，佢定定仔、柔柔仔，當有耐心个等待，正經係老古人言講个：「甘蔗食了一目正一目」，毋好「打卵就愛見黃」。看著這靚膩膩个花仙子，親像係同 兜講等人生當多道理啊。

¹ 興嘍嘍仔：音 him du du e`；興沖沖的。

² 蠶仔：音 cam` e`；蠶。

³ 狗呷烏蠅，賭造化：音 giu` gab vu` in`，du` co fa；狗突然張口去咬飛過的蒼蠅，能否咬到就看運氣。

⁴ 辽辽腦轉：音 din` din` no` zon`；繁忙、躁動不安。

⁵ 呢絲：lien` sii`，吐絲。

⁶ 跔等：音 giu` den`；蜷縮著。

⁷ 蠶筴：音 cam` giab`；蠶繭。

⁸ 哩啲：音 lio`；語氣詞「哩、啲」合音，表示變化已經實現。